

四庫全書

集部

欽定四庫全書

盤洲文集卷七十六

宋 洪适 撰

墓誌二

劉府君墓誌

紹興二十六年十月癸酉成都劉府君卒於梁山年六十五其孤徒行迎柩以明年十月辛酉葬于華陽縣普安鄉白土里又明年十月萬州使君仙井何公棧舩江

夏予造焉萬州曰室人擊鮮治具謂當有嘉客而君迺肯臨我則開口一笑良已前定因出諸郎行酒曰是皆劉出也劉公成都有二女其長歸于我若干年而逝繼室以其季公疏財好客其女目濡耳習咸有家法越三日又會于南樓曰昔吾守景陵也公曰聞雲夢澤之名舊矣不一往非鄙則病遂御舳東下山容浦思振筆嘲吟興遠辭綺仞積囊篋一旦蜚歸心索酒展別摩拊甥孫悲來下泣嬰恙中道以不起聞今既寔且祥矣未

文其墳非君其誰宜為萬州英邁不虛美者予曷敢不
諾乃考其辭曰劉在成都為右姓羣從同坊閑閤相接
所謂夾寨劉家府君少不羣有奮拔志嘗曰劉氏善富
數世所不足者非財也不學無以崇孝享宗則作家塾
聚書求師友合同族之子姓朝夕咨討居亡何從兄長
源擢政和進士科府君諗于衆曰非舌耕明驗歟入類
宮以詩學屢最其列從兄黻為戶部郎又入京師有聲
于賢闕月校季選同舍生自以不及府君有寶帶鼎貴

求旃弗與或曰啗之可以仕子何愛焉曰學不遂命也
帶其褊矣既而曰匹夫懷璧罪將及即拂衣西歸彗汜
三徑與雅人望士娛其間奴僮走異味於數十百里觴
豆雜襲放歌樂飲井中車轄後前相因少城為冠蓋衝
遊客入疆聞府君家居則策馬徑進否則不歇鞍而行
仕其邦者府君未嘗賣刺過之便坐有棋局客至必對
韜其藝不盡出也會通國之善者與我終日不名負勝
人始驚其奕思無敵同產求分財不能過則自占田廬

之下下者或緣手盡復推予之綿州守臨邛朱輅簡州
治中唐安楊次臯茶馬屬和義王興孫其女兄弟之夫
也白頭交驩無違言好施惠出天性凡以冠昏貧病死
徙叩門乞貸無戚疏高下皆實而歸至有爭鬪不到官
府惟府君曲直則頻首聽命始冠有外姻為無賴子所
辱遇之塗輿俱立縣尹庭下其人少長山谷間未識市
井詣曹不能出一語府君抗聲為辨數得直衆繇是異
之紹興初敵騎犯饒風蜀騷然不安急欲遁逃府君曰

敵入漢中，樵蘇不踵，前有劔關，後有河池，重兵必不為我患。與其宗家高枕不去蜀人，曰夾寨劉家，未避賊皆復治生業。後果如其言，晚以賞延得將仕郎，非其好也。時進士兄以湖北使節攝行帥事，屈府君入幕府，意不懌而去。府君諱革，字某，曾祖諱某，祖諱某，生湖北常平諱某，以故累贈朝議大夫。諱某妻某氏，子某嘗試禮部孫某壻，則所謂萬州使君。今為右朝請郎，名渠靖康相之弟也。銘曰：闕闕贏多金者，裂儒衣，官桑榆者，倒行逆施。

則輕毛毳祿不可羈嗟若人者幾希

朱安人墓銘

夫人饒州樂平朱氏贈右宣教郎同縣夏公諱某之妃
左朝奉郎知洪州南昌縣康佐之母夏氏三世壽母年
皆望百夫人始執箕帚逮事祖姑以及其姑節適寒暑
燥濕進甘膳唯謹有疾親絮湯液不去側縫紉漱浣之
事必躬親之人故稱為夏氏孝婦勉其君子游學四方
有籍籍聲人故稱為夏氏令妻蚤嫠居家浸貧或怵其

事他姓則毅然自誓誨其二子曰康又爾幹家之蠱毋
遠阡陌以奉我水菽曰康佐爾努力校官究六經百氏
之說毋荒于嬉以開厥家二子銜訓不怠夫人見其伯
焦心治生則喜仲旬歲一歸叩其說則又喜天子即位
于睢陽仲徒步入闕上疏論時政嘗求可使絕國者其
子在選中或以親老尼之及歸以告夫人譙之曰立功
名顯父母其孝大於錄錄郝下也其後仲子擢進士丙
科壹為尉再為令奉板輿之官事有疑必啟而後行夫

人嘗以省刑罰薄稅斂為戒素有識鑒其子與僚朋接
必從屏間竊聽其語已而曰某賢人也可以友某小人
也欲其子必思有以遠之故稱為夏氏賢母夫人生少
疾春秋高視聽不衰食生飲寒少壯所不及歲時慶會
內外戚疏遮前塞後以其次曹集奉觴飲之既雖多而
不亂以子恩封太孺人又進太安人以紹興二十七年
六月辛亥終壽八十有四關已先卒某人某人其壻
也孫男四人女六人曾孫六人玄孫一人顧言曰勿遠

營宅兆康佐乃卜所居之西惟錦坡食蓋其縣之某鄉某里也以次年十一月壬申塋走書幣來謁銘始予舉博學宏詞南昌實同年進士講同郡之好而知其學問之富予貳郡天台而南昌官奉化壤相接也則聞其官事之辦及予省親炎荒再道江右會之于吉水又會之于南昌益得其絃歌之績母之教然也其可以不能銘為解乃銘曰遵劍孔時蘋以芼之不愛其織惟樂告之有言恤緯誰者導之黃髮紫誥斯其所以報之文具哀

石後也考之

向通判墓誌

公諱仲堪字元仲饒州樂平人紹興二十七年三月甲午以右朝請大夫通判贛州卒年五十八後二歲予守荆門公兄直秘閣伯奮以節鎮京闕予言曰吾昔為

吉州元仲自贛告相見期吾臨章江日夜遲其下弟弗至而訃實聞在原之痛時往月來猶昔也將歸掃先人墳墓祔其葬今壓於上命不得視其棺入土天將何以

紓吾悲將予銘納諸丘中使死且不朽我亦拭淚不恨
予曰贛州法當銘公言不可忍聽其能飾以辭會予從
歆未克作今年其子友益卜四月乙酉合夫人氏之喪
葬于縣豐樂鄉貴潭之山遂以祔閣公所為狀來闕君

忘荆門之

闕

乎予即日次其事

闕

子姓派於宋繇春秋

以來稱世有人至我宋復盛有篤行君子諱宋尹者生
右朝奉大夫諱蔚大夫生贈少師諱久中嘗知汝州至
徽猷閣待制娶丞相清源王女曰魏國夫人何氏是生

公公方少時頭角巖巖然補太學弟子員一時儕流傾
下之以門功脫褐授承務郎主管亳州明道宮攝開封
丞權貴人請托不聞耳朝士一辭賢之監在京都茶庫
疊受賞渥它日版曹借以臨劇至輒辦再滿秩改監京
西排岸司宣和中詔舉材可治民者公為戶部尚書康
公執權得遂知福之長溪縣繩姦液枯剖析滯訟效異
等驗白瀕海作戰艦起緡錢它邑騷動惟長溪無秋毫
擾丞相李公綱言公可用通判洪州江西故多盜帥梁

公揚祖以嚴治獲者必抵死嘗委公審二盜吏抱成案

來前摘公書紙尾公問盜皆

闕

在吏曰盜服矣官當占

位落筆尚何問公曰吾不見囚則如勿審同寮或訐其

立異公曰得一切便宜從事者師也付之吏則有三尺

法執不回盜得死減論梁大喜自是為霽威盜有生者

幕府事無巨細必參公謀居亡何梁入為兵部侍郎語

人曰吾見上當首薦向君暨梁疾不能朝公亦以憂去

又通判池州贛州贛承叛卒喋血之餘百姓甫免毒螫

公數行太守事摩撫瘡痍流庸盡還大賈訟鹽債鞠繫
數十百人延歲月不決公曰質劑按牘今焚亡餘矣窮
民繫牢戶非瘐死不得出為白外臺請之朝咸得釋公
智略矣輒見事風生持論纚纚有本末坐上客傾聽方
事之叢它人園視無措公笑語指麾冰釋縷解使有位
於朝其建置當不錄錄或專一城使一道必能為人所
難惜乎年不過六十位不過州佐抱才弗施事止此配
何氏直龍圖閣琬之孫魏國從子也事姑孝藥膳非經

手不進誦釋氏金剛經悟四句偈臨終沐浴更衣集子
婦付家事一語不亂公卒之明年六月辛卯也年五十
七累封宜人男子六友益右從事郎淮西江東總領所
贍軍庫友旦右迪功郎廣德主簿友憂友正皆將仕郎
友恭未仕女子二長適右迪功郎巴陵主簿程湜孫男
三可大彌大必大孫女四今年實紹興三十年銘曰厥
智穀轉猶玉弗銜前輓後推止刺史半彼平平者印累
節召縮手襲間不嘖以笑貴潭之宅維龜墨食後昆振

振曰君子澤

徐府君墓誌

紹興二十九年慈寧宮太后聖壽八十天子進觴展慶
推錫類之澤凡九品有秩其親耄齒者咸得官封饒之
樂平徐君諱某以其子前太平州司戶叅軍某之故特
封右承務郎致仕制書下君秀髮豪眉舒紳擁笏偃躬
下拜孫曾繩繩導趨後先遠近姻族無少長皆往賀象
軸錦韜爭快先覩君侈上之恩魚羔酌醴日與賓客相

娛樂絲竹莞絃之聲輩作肅餞酬對精神不少哀以某
年某月某日卒春秋九十有一子中表或與之有連不
憚嶺阨袖其事來乞文乃為之崖略其說云君之字某
其先自洪徙焉曾大父某大父某生廣東轉運副使某
累其贈至通議大夫父某君嘗提筆與逢掖游會親疾
歸視方藥訖喪遂無干祿意隱居治生其心計絕人遠
甚不夸多田以園奪窶人子不以子金錢求倍稱之息
不射時幹貨以壅斷一鄉閱數年錢流地上乃築室石

硯之陽走奴隸求古今方策于異州旁縣延致知名士
教勒子孫族兄某渥江東使者節番其治所也君則閉
闔省人事家書為之疎闊歲乙卯大饑米石至萬錢皆
閉糴君傾囷不小靳又輸粟郡乳聚餓者于僧坊哺之
或求其別圃君曰是嘗以佳花遺我歸其金而予之券
或以田質積歲無以償則火其約聞人急周之唯恐後
始室某氏再某氏四男某某某某三女為某某某妻孫
男若干女若干曾孫男女若干君自擇壽藏于某鄉某

原卜次年某月甲子寔銘曰富而仁善充其身旣期而出綸有息業文宜昌而屯將在後之人

白宜人墓誌銘

紹興三十年冬直寶文閣許公遣書抵予曰吾不幸失匹將以日月葬方整比事迹須君為文以銘之予曰公我丈人行也而從妹又辱為介婦我於東阡北陌間聞宜人壺德舊矣敢不諾居無何公亦以訃至會予持節過家其孤聞詩迎于道手母氏之狀曰古者有掛劔之


信君忘之乎先君有治命敢以請予即受而敘之宜人
白氏諱慶通字慧應太宰秦國公相徽宗諱時中之第
三女公相在位時呼延夫人即世二女已聘遣關以內
宜人悉尸之媼御數十輩事以小大必咨而後敢行其
顧指條序雖老成人自歎不及丞相愛奇之遴所歸於
是鄱陽許公擢第有令名遂歸焉舅姑春秋高安于鄉
里朝廷設八行科郡以皇舅金紫公應令深辭不出宜
人生不及盥饋暨持喪哀矜過制歲時祭祀則臨庖廚

眠滌濯執器上食必躬親之遇諱日口誦佛語不輟雖
逮事者不能過也寶文翔厯內外五十年帥節州麾所
居播扈聞助為甚多謗起桂林將簿對比郡宜人曰君
俯仰無一毫愧怍行乎庸何傷公既直所枉猶坐瘐死
者為累家食垂十稔宜人慮公以榮槁綴懷客至脩具
甚設使相娛樂平居對案而食僮闕侍前日下吳必舉
觴三五行如賓朋然故寶文方羊林壑泰如也宜人生
相家乃不喜文綉珠翠之飾所謂時世粧者見則鄙之

諸婦若女從其夫之官必以同僚通家為戒曰富貧不
併日語奢儉異尚或恥或羨則不安其室矣一日呼季
女啓笥曰吾周身在是家人驚問之不答閱日而逝三
受封至宜人壽至七十有二卒以二十九年十一月丁
未葬以三十一年十一月甲辰兆以樂平縣長城鄉之
卯龍坡子十人男聞一右文林郎徽州績溪尉次聞義
前卒次即聞詩右文林郎常州晉陵簿次聞禮右修職郎
純州巴陵尉嘗貢禮部女長前卒次嫁右通直郎知蘄

州黃梅縣管鑄右承事郎徽州祈門丞程遜通仕郎胡
如愚二尚處嫁程氏者亦前卒孫七人壽俊將仕郎壽
朋壽祺壽豈餘女也白氏故某州人有左神武將軍者
在國初勲臣籍生保州刺史諱延嗣太平興國中賜第
京師永昌坊贈相國公葬于壽春其後遂為壽春人保
州生累左驍衛將軍諱文質贈燕國公以女妻大魁劉
輝於布衣時故其子始用文變武闕進士起家歷守蔡
潤二州有能名贈魏國公諱某闕為宜人大父自保州

而下以丞相故皆贈太師金闕諱某寶文諱某以左朝
請大夫復直秘閣後宜人若干日而終銘曰生身相門
侈習弗蹈婉德儒先鏘鏘偕老雙劒聯飛松栢夾道有
子有孫為善之報



盤洲文集卷七十六

欽定四庫全書

集部

盤洲文集卷

七十七至
八十

詳校官庶吉士_臣初喬齡

主事_臣

呂雲棟覆勘

總校官編修_臣王燕緒

校對官中書_臣李斯咏

謄錄監生_臣胡晉

欽定四庫全書

盤洲文集卷七十七

宋 洪适 撰

墓誌三

慈瑩石表

太夫人沈氏常州無錫人祖諱宗道贈朝請郎考諱復
仕至朝奉大夫贈左中奉大夫妣令人陳氏政和五年
先君及進士第太夫人之兄太學博士松年在京師聞

先君名定婚焉先君既調官與太夫人歸鄉家故貧有妹未行太夫人傾奩中裝資遣之先君官浙東西奉祖母安與太夫人承顏色一以順朝晡所食寒燠所衣節適盡志祖母即時病視絮湯液不去側夜分不脫衣倦則假寐建炎三年先君奉使朔庭時祖母年出七十方寇盜旁午外無寧居泊家秀州長子适纔十三穉兒多未免懷不敢以家事辭繫太夫人是賴他姬有子太夫人恩之有過于已出者一姬甚器以太夫人鍾愛其女

意小不憚故笞辱之以撓太夫人啼聲一聞則感然見
顏面必俟其嬉戲復常乃悅終不少譴其母蓋其仁厚
出天資行於自然未常有所彊勉數數然也生理既薄
所仰以給者唯先君奉入衣服飲食取財足至諸子買
書或捐錢數萬不靳訓之曰爾父以儒學起家爾曹能
一人趾美我不恨嘗為之迎師千里外雖隆寒盛暑不
使輟叔氏之妻既移夫于他門矣復失匹無所于歸太
夫人并其母畜於家不與娣姒時異訖又嫁乃已平生

靖重口不挂人之過差心不念人之舊怨左右童侍不聞一厲聲見一怒色盛德著於閨庭放乎鄉黨遠近咸踈識與不識講太夫人賢以為口實紹興八年十一月二十三日不疾而終享年五十初先君宦吳久又寓秀男女昏嫁在焉太夫人稍儲奉餘買田一廛於舅氏倉卒棄刀筥鄉關回遠莫能辨歸計諸子稟舅氏指護櫬往無錫以明年十一月辛丑莫於縣開化鄉白茅山之原窆之四年先君持節南歸祖母故無恙所留九男女

皆在旁而太夫人獨下世先君痛之常欲反柩於鄉而陰陽以為吉卜不克徙後十二年先君薨諸子用治命不敢祔二塋相望千五百里春秋祭祀弗洒弗掃遵通判常州日以行縣數上塚适使浙西即移官厓得一拜墓下前年遵守吳門始能立屋數十楹於墓道西居僧以職香火邁官於朝從督府江上繼廷勞使客且報聘六往來縣中皆以王事奔命不獲往松秋結戀為諸子無窮悲今适在京口尺五拱木扁舟三日事爾而又不

能孤墳異縣懼數世之下樵蘇之不禁也乃書石表諸
隧上陵湮谷變知其為鄱陽洪氏慈塋尚勿圯也太夫
人以先君恩封令人贈碩人以遵入翰苑贈淑人以四
子恩追封鄱陽郡夫人以遵入樞府進博平郡始時執
喪者子孫十人歷二十六年唯他姬子邈不幸死凡男
女孫曾其存者三十有九蓋子十五人八男七女迺遵
邁以太夫人薨後始中博學宏詞科遂養官榮蒙祿仕
而三釜之養不洎矣悲夫迺令為左朝請大夫戶部郎

中總領淮東軍馬錢糧遵左中大夫同知樞密院邁左
朝奉大夫前起居舍人逖右承議郎鑄錢司主管文字
遜右宣議郎浙西安撫司准備差使遽迅皆右承奉郎
女三蚤卒次嫁右從事郎董公衡公衡卒更嫁左朝奉
郎楚州通判余執度次嫁右承直郎王駉次嫁將仕郎
臧棟次許嫁同進士出身朱晞顏孫二十四人十四男
十女槻柅楸櫓檣桴楹棹柁梓椿柳機楠槻右迪功郎
湖廣總領所幹辦公事柅右脩職郎楸將仕郎槁右從

事郎與秘皆監南嶽廟櫓將仕郎樺右承奉郎許嫁之
二女壻左承事郎僉書平江軍判官木待問左迪功郎
饒州司戶許及之曾孫四人男曰忱先君諱某終徽猷
閣直學士鄱陽侯賜諡忠宣贈太子太師

羅尚書墓誌銘

公羅氏諱汝楫字彥濟其先自豫章辟五季之亂徙家
於歙遂為歙人曾祖諱仁昇祖諱承吉考諱舉以公故
累封至右朝請大夫羅本春秋時小國在襄之宜城又

徙荆之枝江衍姓臯陶之後國近楚後為楚所并苗裔
遂氏其國涉晉及唐聞見史策其名未彰徹至公而羅
氏始大公強記妙言語年十六貢辟雍角出儕類鄉先
生胡仲為司業每對客誦其文博士毛友龍雅好古能
於稠衆中辯所作第政和二年進士教授郴州眉山唐
庚見其詩擊節賞之改興國軍永興丞遭母胡宜人喪
後為池州儀曹歷江東轉運司幹辦公事通判江州擢
樞密院計議官又通判鎮江府監登聞鼓院除大理丞

遷刑部員外郎以次面對謂養子之禁不寬則殺子之風不革請因貧困而以襁褓之子與人者毋拘以異姓占奏詳盡即拜監察御史不閱月遷殿中侍御史撫州兩陳四繫獄誤論輕罪者死公上疏寬傷之始詔天下斷死刑守以下引因問姓名鄉里然後決廷議防守江淮異同乖戾公言大駕幸臨安以江為牆壁淮為藩落二者備等耳今武昌至當塗營壘相望淮濱獨山陽一軍非策也劉錡以孤軍卻敵於順昌他師亦踴躍爭奮

請更戍以休其衆間諜各私其疆封言人人殊請西府
擇一謹信者總其事江西羣盜窟穴潮漳之間蹤捕者
不越境請三路憲臣通治之戶部符缺郡折民口紬絹
一縑八十請從其便輸本色或以田業多寡率財供軍
公言州縣有被災害什四以上及盜賊未衰息者若雷
同箕斂則民不堪命官吏以趣辦受賞者請刪其科又
乞調武人作兩淮守置都統制以護南北諸屯草竄名
賞籍人以勸立功者遷起居郎權中書舍人遷右諫議

大夫兼侍講上問或謂春秋無褒然乎對曰春秋上法天道春生秋殺若貶而不褒是有秋無春也上曰自王安石廢春秋學聖人之旨寢不明近日得其要者胡安國與卿耳中官梁邦彥用藍珪例免減借月廩外戚錢愷用潘長卿例落階官公皆論其不可又請獎用五嶺進士以風厲遠學遷御史中丞條陳治獄理財宣詔握兵之弊皆中時病或請下州郡分掾屬比輯續降條法施行之公言祖宗畫一之法悉出仁恕艱難以來奇請

他比有罔密文峻之失其便於後者宜疏為令否則削之馬院舊占富陽沙田為牧地馬不至而民代輸如故公請還其地予民遷吏部尚書兼侍講東朝歸自朔方天子以孝治天下廷中持橐而奉親者公及魏公良臣林公待聘凡三人公在經幄上屢問卿父安否嘗以當遷一官易緋魚為親寵居頃之以父母春秋益高懇求便郡奉甘旨除龍圖閣學士知嚴州三衙卒入州境捕民為兵公闕其人歸之有闕轄始至遺鞍馬縑帛之類

甚腆公邵之

闕

而果有私請白焉集黃堂其僚欲奉瑞

不許居三歲勾閒提點江州太平興國宮四其任築室
焉聊山之陽疏巖斷壑亭榭爽曠父子白首鄉黨榮之
歲在戊寅大夫公即世公執喪茹哀後二年五月丁亥
薨年七十蓋紹興二十八年也積官左朝請大夫既謝
事進一秩計聞贈四秩長子遇明堂恩贈左通奉大夫
爵新安郡侯邑戶一千五百實封三百三淑人呂氏王
氏俞氏後二年三月乙酉葬於縣之寧仁鄉汪龍原以

俞淑人祔六男子今皆除喪矣長某右通直郎湖北安撫司主管機宜文字顓右宣教郎主管崇道觀頡右承奉郎監泉州市舶務頌右承務郎監鎮江府排岸願右承務郎監饒州景德鎮頹右承務郎監臨安府新城稅二女子右從政郎荆南節度推官胡昌右奉議郎僉書常德軍節度判官俞穡其婿也孫男十三人表臣右承務郎監宣州水陽鎮庀臣右脩職郎婺州蘭溪簿元臣介臣克臣信臣世臣力臣似臣鼻臣縉臣正臣扈臣女

三人曾孫男二人公形貌頎碩音如洪鐘上嘗謂其南人似北平生寡嗜好於物無所玩自以布衣起閭巷服飾皆事朴素與人交不強相取下對人言若恐傷之或有片善稱之不容口可以推轂則舉手不以為難其學問醇正筆力雄健言必關於教化不出奇以譁衆取寵前後論諫數十百篇反覆詳盡粹然皆忠厚之說入朝八年以令名始終不一遭詆訾有東山猥稿二十卷奏議八卷外制二卷藏於家始某舉博學宏詞公實持文

衡及假守新安公殯在堂入哭之慟諸孤楹然來謁銘
誼不得不諾去郡之明年乃克為之銘曰

羅以國氏鼻祖咎繇晉唐有人未都大僚揭揭尚書超
軼系譜擧翔帝城自結當宁臺評諫紙霜凝筆端語妙
鷗閣獎草天官論思十載名聲寡雙河圖峻職釣瀨輔
邦七十執喪華髮素鞵終始宦岐瑩無一失汪龍之陽
松柏布布四山如厲永閔冠屨

俞淑人墓誌銘

龍圖閣學士新安郡侯贈左通奉大夫羅公諱汝楫之
夫人湖州安吉俞氏女也曾祖諱汝尚屯田郎中贈左
正議大夫祖諱溫父朝議大夫贈少師考諱侯敷文閣
直學士吳興郡侯贈右宣奉大夫紹興二十八年五月
十七以八月二十五日終積封淑人又二年三月乙酉
合葬於徽州歙縣汪龍之原淑人柔嫺簡靜幼不嬉弄
暗誦孟莊諸子書知婦人法度之事刀尺縫紉不學而
工母和義郡夫人陳氏性嚴淑人垂髫在旁遇其笞怒

妾媵必委曲營護譴者多賴以免吳興公繡衣持斧過江東聞新安公之賢以淑人配之新安公筆耕起家尚儉朴門中無華靡之飾淑人來自冠族處之晏如前夫人有四子愛均已生新安公在諫垣御史府吳興公以從橐尹京兩家鼎貴金玃照映淑人出覲其親有侍鄰之孝入翼其夫有齊眉之敬左右內外不一見其驕奢之色新安公退而里居淑人則進其子於學晨昏定省必問所以修業狀俱卓然有立嗚呼其賢如此四子頡

泉州市舶務頌鎮江府排岸願饒州景德鎮潁臨安府
新城稅頌右承奉郎頌以下皆右承務郎孫男五人女
一人某既為新安公作銘其子復以淑人之銘為請乃
銘曰父兮顯顯夫兮振振其生也何恨山兮聯聯水兮
綿綿有子兮營其阡

萊國墓銘

萊國夫人姓沈氏諱德柔常州無錫人左中奉大夫諱
復之孫太學博士諱松年之女魏國夫人之姪年十有

六歸於洪氏為太師魏國忠宣公之冢婦尚書右僕射
同中書門下平章事觀文殿學士都陽公某之夫人事
魏國甫三年自嘉禾奉柩至無錫治葬時魏公留北庭
子家八弟妹食指稍衆夫人職其憂厥後魏公落南予
從天台歸時遭秦氏廢錮又往來鄴下家用益不足一
衣一縑無不質諸人如是一星終夫人不戚戚也暨天
日清明予起典州厯侍從持鈞樞間八年夫人六拜恩
封至賜國于萊始訢訢眉伸償已往困未嘗以榮渥自

大予從會稽歸得別墅於城陰築臺觀藝花竹夫人喜
同其遊臨水看山常至日昃歸則孫枝詵詵含飴足樂
俯育僮幼極其慈愛不幸枕疾七寒暑以淳熙六年八
月二十一日薨年六十有一夫人性和易口不道人長
短故中外娣姒踈近族姻終始無違言昏嫁叔妹五盡
心不諱勞凡器物簪珥弗少靳病中自辦斂具衣衾柩
褥一一皆備身後事則無片語及之予素惡錢穀米鹽
之問閭門百口伏臘瑣碎率皆夫人區處故柩內之事

文苑英華

縣懷德鄉之徐村銘曰蘋蘩詩缺松檟成列百歲之後
與子同穴

盤洲文集卷七十七

欽定四庫全書

盤洲文集卷七十八

宋 洪适 撰

樂章一

番禺調笑

勾隊

蓋聞五嶺分疆說番禺之大府一尊屬客見南伯之高
情撫遺事於前聞度新詞而屢舞宮商遞奏調笑入場

羊仙

黃木灣頭聲闕然碧雲深處起非煙騎羊執穗衣分錦
快觀浮空五列仙騰空昔日持銅虎嘉瑞能名灼前古
羽人叱召會重來治行於今最南土

南土賢銅虎黃木灣頭騰好語騎羊執穗神仙
五拭目摩肩爭觀無雙治行今猶古嘉瑞流傳

樂府

樂洲

傳聞南漢學飛仙煉藥名洲粉雉邊爐寒竈毀無蹤跡
古木間花不記年惟餘九曜巉巖石寸寸淪漪湛天碧
畫橋彩舫列歌亭長與邦人作寒食

寒食人如織藉草臨流羅飲席陽春有脚森雙
戟和氣歡聲揚溢洲邊藥竈成陳迹九曜摩挲

奇石

海山樓

高樓百尺邇嚴城披拂雄風襟袂清雲氣籠山朝雨急

海濤侵岸暮潮生樓前簫鼓聲相和戢戢歸櫓排幾柁
須信官廉蛤蚌迴望中山積皆奇貨

奇貨歸帆過擊鼓吹簫相應和樓前高浪風掀
簸漁唱一聲山左胡牀邀月輕雲破玉塵飛談
驚座

素馨巷

南國英華賦衆芳素馨聲價獨無雙未知蟾桂能相比
不是人間草木香輕絲結蕊長楹穗一片瑞雲縈寶髻

水沈為骨麝為衣
麝馥三熏亦名世

名世花無二
高壓閣提傾
末利素絲縷
縷聯芳藥一
片雲生寶髻
屑沈碎麝香
肌細麝馥熏
成

心字

朝漢臺

尉佗怒臂帝番禺
遠屈王人陸大夫
只用一言回倔強
遂令黽結換襟裾
使歸已實千金橐
朝漢傾心比葵藿
高臺哭兀切星辰
後代登臨奏音樂

音樂傳佳作蓋海旌幢開觀閣綺霞飛渡青油
幕好是登臨行樂當時朝漢傾葵藿望斷長安
城郭

浴日亭

扶胥之口控南溟誰鑿山尖築此亭俯窺貝闕蛟龍躍
遠見扶桑朝日升蜃樓縹緲擎天際鵬翼續翻借風勢
蓬萊可望不可親安得輕舟凌弱水

弱水天無際相去扶桑知幾里高亭東望陽烏

起杲杲晨光初洗蓬萊欲往寧無計一展彌天

鵬起

蒲澗

古澗清泉不歇聲
昌蒲多節四時青
安期駕鶴丹霄去
萬古相傳此化城
依然丹竈留巖穴
桃竹連山仙境別
年年正月掃松關
飛蓋傾城賞佳節

佳節初春月飛蓋
傾城樽俎列安期
駕鶴朝金闕
丹竈分留巖穴山
中花笑秦皇拙
祠殿荒涼

虛設

貪泉

桄榔色暗芭蕉繁中有貪泉湧石門一杯便使人心改
屬意金珠萬事昏晉時賢牧夷齊比酌水題詩心轉厲
只今方伯擅真清日日取泉供飲器

飲器貪泉水山乳涓涓甘似醴懷金嗜寶隨人
意任受惡名難洗真清方伯端無比未使吳君
專美

沈香浦

炎區萬國侈奇香，捆載歸來有巨航。
誰人不作芳馨觀，巾篋寧無一片藏。
飲泉太守回瓜戍，搜索越裝舟未去。
惹政何從起謗聲，沈香不惜投深浦。

深浦停舟處，只恐越裝相染污。
奇香一見如泥土，投著水中歸去今。
公早晚回朝著，無物遲留鳴櫓。

清遠峽

腰支尺六代難雙霧鬢風鬟巧作粧人間不似山間樂
身在帝鄉思故鄉南來萬里舟初歇三峽重過驚久別
玉環留著綴相思歸向青山嘯明月

明月舟初歇三峽重過驚久別玉環留與人間
說詩罷離腸千結相思朝暮流泉咽霧鎖青山
愁絕

破子

南海繁華最城郭山川雄嶺外遺蹤嘉話垂千載竹帛

班班俱在元戎好古新聲改調笑花前分隊 高會樽
壘對笑眼茸茸回盼睽踟筵低唱眉彎黛翔鳳驚鸞多
態清風不用一錢買醉客何妨倒戴

遣隊

十眉爭艷眼波橫蛺袖回風曲已成絳蠟飄花香卷穗
月林烏鵲兩三聲歌舞既終相將好去

勾降黃龍舞

伏以玳席接歡杯灑東西之玉錦裯喚舞釵橫十二之

金咸駐目於垂螺將應聲而曳繭豈無本事願吐妍辭

答

眇流席上發水調於歌唇色授裾邊屬河東之才子未
滿飛鷄之願已成別鵠之悲折荷柄而愁縷無窮剪鮫
綃而淚珠難貫因成絕唱少相清歡

遣

情隨杯酒滴郎心不忍重開翡翠衾封却軟綃看錦水
水痕不似淚痕深歌罷舞停相將好去

勾南吕薄媚舞

羽觴碁布洽主禮於良辰翠袖弓彎奏女妖之妍唱遊
絲可倩本事願聞

答

踏軟塵之陌傾一見於月膚會來蘋之洲迷千嬌於雨
夢且蛾眉有伐性之戒而狐媚無傷人之心既吐艷於
幽閨能齊芳於節婦果六尺之軀不庇其伉儷非三寸
之舌可脫於艱難尚播遺聲得塵高會

遣

獸質人心冰雪膚名齊節婦古來無纖塵不蛻西州路
爭得人知是艷狐歌舞既闌相將好去

漁家傲引

伏以黃童白叟皆是烟波之釣徒青笠綠蓑不識衣冠
之盛事長浮家而醉月更輟調以吟風樂哉生涯翻在
樂府相煩女伴漁父分行

詞

正月東風初解凍漁人撒網波紋動不識雕梁并綺棟
扁舟重眠鷗浴鴈相迎送溪北畫橋彎蟠螭溪南古
岸添青葢長把魚錢尋酒甕春一夢起來拈笛成三弄
二月垂楊花糝地荻芽迸綠春無際細雨斜風渾不避
青笠底三三兩兩鳴榔起新婦磯邊雲接袂女兒浦
口山堆髻一擁河豚千百尾搖食指城中虛却魚家市
三月愁霖多急雨桃江綠浪迷洲渚西塞山邊飛白鷺
煙橫素一聲欸乃山深處紅雨繽紛因水去行行尋

得神仙路樓閣五雲心不住分鳳侶重來翻恨花相誤
四月團荷錢學鑄鱗鱗波暖鴛鴦語無數燕離來又去
魚未取釣絲直上蜻蜓聚風弄碧漪搖島嶼奇雲蘸
影千峯舞騎馬官人江上駐天且暮借舟送過滄浪渡
五月湖中菱芰遍絲綸欲下相縈絆却棹船來芳草岸
呼侶伴蓑衣不把金章換碧落雲高星爛爛波心舉
網星光亂躍出鯉魚長尺半回首看孤燈一點風吹散
六月長江無暑氣怒濤激侵沙嘴颭颭輕舟隨浪起

何不畏從來慣作風波計 別淑藕花舒錦綺採蓮三
五誰家子問我買魚相調戲飄菱製笑聲咭咭花香裏
七月凜秋飛葉響長吟杳杳澄江上禿尾槎頭澄一網
絲自紡新炊菰飯更相餉 渡口青烟藏疊嶂岸傍紅
蓼翻輕浪瀾瀾沈浮雙漾漾聞鳴槳高飛拍拍穿林莽
八月紫萼浮綠水細鱗巨口鱸魚美畫舫問魚篙暫樣
欣然喜金盞頃刻嘗珍味 湧霧驅雲天似洗靜看星
斗迎蟾桂枕棹眠蓑清不睡無名利誰人分得逍遙意

九月蘆香霜旦旦丹楓落盡吳江岸長瀨黃昏張蟹斷
燈火亂圓沙驚起行行鴈半夜繫船橋北岸三杯睡
著無人喚睡覺只疑橋不見風已變纜繩吹斷船頭轉
十月橘洲長鼓柁瀟湘一片塵纓洗斬得釣竿斑染淚
中夜裏時聞鼓瑟湘靈至白髮垂綸孫又子得錢沽
酒長長醉小艇短篷真活計家雲水更無王役更田稅
子月水寒風又烈巨魚漏網成虛設圍圍從他歸丙穴
謀自拙空歸不管旁人說昨夜醉眠西浦月今朝獨

釣南溪雪妻子一船衣百結長歡悅不知人世多離別
鴈月行舟冰鑿鑿潛鱗透暖偏堪射歲歲年年蓬作舍
三冬夜牛衣半暖何須借 滕六曉來方命駕千山絕
影鳥飛怕江上雪如花片下宜入畫一蓑披著歸來也

破子

漁父飲時花作蔭羹魚煮蟹無他品世代太平除酒禁
漁父飲綠蓑藉地勝如錦

漁父醉時收釣餌魚梁鰲翅閒烏鬼白浪撼船眠不起

漁父醉灘聲無盡清雙耳

漁父醒時清夜永澄瀾過盡征鴻影畧畧風來歌舴艋

漁父醒月高露下衣裳冷

漁父笑時鶯未老提魚入市歸來早一葉浮家生計了

漁父笑笑中起舞漁家傲

遣隊

春留冬及一年中杜若洲邊西又東舞散曲終人不見
一天明月一溪風水綠山青持竿好去

盤洲文集卷七十八

欽定四庫全書

盤洲文集卷七十九

宋 洪适 撰

樂章二

鷓鴣天

次李舉之見寄韻

報答風光思更新安排好語續陽春
羅胃玉藻英華別信手銀鈎點畫勻
歌妙曲想光塵相望尺五歎參辰
曲終強對紅顏笑欠我高談驚座人

生查子

收燈日次李舉之韻

廉纖小雨來噤瘳輕寒乍絲竹送迎時燈火闌珊夜
銅壺漏故遲銀燭花頻耗懷我獨醒人健筆方飛灑

蝶戀花

漠漠水田飛白鷺夏木陰陰巧囀黃鸝語金鎖詩人新
得句江山應道來何暮好向金門聯步武何事雙旌
却為丹丘駐瓊竿十分須一舉看看紫詔催歸去

減字木蘭花

曾砧父落成小閣次其韻

藩車容裔挺挺風流追兩地
聚斗分星詩句當年汗簡
青疎簾披繡共看橫雲晴出岫
新月如鉤來照瓊彝
醉小樓

好事近

東湖席上次曾守韻時莫曹同席

風細晚軒涼妙句初揮新墨
綠水池中賓佐對嫩荷擎
綠坐看新月上雲頭清臂
闕寒玉只恐朝來酒醒有
文書羈束

虞美人

芭蕉滴滴窓前雨望斷江南路亂雲重疊幾多山不似
倦飛鷗鷺便知還角聲更聽譙門弄夜夜思歸夢都
江樓下水含漪辜負釣灘煙艇綠簑衣

卜算子

席上贈瞻明

修竹拂疎檣淡月浸涼榭四畔青山進好風金鴨香煤
炷寶唾粲珠璣長袖飄蘭麝莫問更樓夜若何且結
高陽社

江城子

贈舉之

冥冥雲嶼兩經秋
落霞收斷煙留小閣涼生清馥凝金
虬乘興開顏那草草煩玉腕舉瓊舟
明年此日楚江頭
極層樓望丹丘只恐溪山千里礙凝眸
重倚欄干相憶處尋過鴈作書郵

減字木蘭花

太守移具餞行縣偶作

使君情懷念我明朝移縣去一醉相留和氣歡聲到小樓
暫時南北莫唱渭城朝雨曲此去農郊收拾童兒
五袴謠

浣溪紗

邦伯今推第一流，幾因歌席負詩籌。一時文采說台州。
雨脚漸收風入牖，雲心初破月窺樓。翠眉相映晚山秋。

秋

望海潮 題雙巖堂

重溟倒影五芝含，笑神仙。今古台州山擁黃堂，煙披畫戟。
雙巖瑞氣長浮，前事記黿頭。有百年臺榭，千室嬉遊。
墨寶淒涼風淩雨，蠹盡悠悠。規恢共仰賢侯，當政成。

五月景對三秋飛棟干雲虛欄受露放懷不減南樓賓
燕奉觥籌妙綺箋瓊藻聲度歌喉只恐棠陰成後趣去
侍凝旒

好事近

小閣過重陽愁對輕篁團色喜得蠻牋新唱似夜光明
月 萸房菊蕊定相憐酌酎娛蕉葉猶記去年今夜聽
歌聲清切

清平樂

次曾守韻

風鬟飛亂寒入秦箏鴈情似雲陰渾未展兩脚更飄銀
線橫枝有意先開玉塵欲伴金疊何日舞裯歌扇後

堂重到惟梅

郡有惟梅堂

選冠子

雨脚報晴雲容呈瑞夜雪縈盈連晝千巖曳縞萬瓦堆
瓊稍稍冷侵懷袖鶴氅神仙兔園賓客高會坐移清漏
想灞陵橋畔苦吟緩轡聳肩寒瘦向此際色映堂陰
香傳梅影寒力更欺尊酒左符詞伯蠻牋巧思不道起

風飛柳舞態弓彎一聲低唱蛾笑綠分煙岫任盃行激
灩為公沈醉莫教停手

好事近

為錢處和寄

縹酒頌青春不減宜城桑落樓下玉人凝笑散萬英千
萼 繡衣當日帝王州橫飛看雕鶚聞道賜環書下向
金門持橐

鷓鴣天

次曾守遊梅園韻

領客攜尊花底開薄寒初送雨聲來一聲未弄林間笛

幾片低飛閣下梅 酬的樂少遲回不妨春雪散銀杯
玉肌莫放清香散更待晴時賞一迴

浣溪紗

餞范子芬行

整頓春衫欲跨鞍一杯相屬少開顏愁蛾不似舊時彎
未見兩星添柳宿忍教三疊唱陽關相思空望會稽
山

又

以鴛鴦梅送曾守是日曾守攜家遊南園

報道傾城出洞房水邊疎影弄清香風流更有小鴛鴦

蟬鬢半含花下笑蛾眉相映醉時粧夢魂不到白雲鄉

又

以鴛鴦梅送錢漕

玉頰微醺怯晚寒可憐凝笑整雙翰枝頭一點為誰酸

只恐輕飛烟樹裏好教叙挿鬢雲邊淡粧仍向醉中看

又

席中答錢漕

憶得熙春曉立班使星曾入紫微垣歸來小飲友芝蘭

投轄風流今復見開尊禮數自來寬更看寶唾寫烏欄

清平樂

以千葉粉紅牡丹送曾守

輕紅淡白蓬閨神仙謫魏紫姚黃誇異色到得海邊初
識玉欄不語如顰虛教春盡三分却問檀心誰向多
情更屬東君

生查子

桃疎蝶惜香柳困鶯驚絮日影過簾旌多少愁情緒
紅慘武陵溪綠暗章臺路春色似行人無意花間住

思佳客

次韻蔡文同集錢漕池亭

花信今無一半風芙蓉出水幾時紅看成弱柳陰陰綠

自在遷鶯巧語中 風傍戶月留空金尊相對醉珠璣
歸鞭欲指江南處回首霞標憶舊峯

朝中措

曾守生辰

當年召父治南陽十室頌慈祥今代天台太守聲名已
達巖廊 風流閒暇胡牀乘興燕寢凝香好去花甌視
草珠庭喜見微黃

江西文派有新圖詩律嗣東湖十首齊安書事君王曾
問相如 牙籤繡架銀鉤落紙美玉明珠見說詔藏金

匱後來天下渾無

又 鄧鹽生日

青雲垂下不爭程
繡斧寄澄清
黃木灣頭人鬧耳
邊都是歡聲
仙家咫尺波涵
潑潑路挹蓬瀛
十日東君不老
一星南極長明

又 師生日

斗南樓閣舞祥雲
為壽幾多人
有客恰如東海
年年為滿金樽
無雙治行兒童
詠德草木霑
仁只把空虛三

院亦須笑傲千金

又 蘇少連母生日

西崑當日下雲駟米藻奉蘇仙玉節榮看常棣斑衣笑
俯芝蘭 壽觴爭舉歌紫蛾綠香裊龍涎須與寄聲鸞
鶴飛來歲歲年年

又 黃師憲侍兒倩奴

嘉禾一別十經春清泚記垂綸今日天涯淪落楚然一
見佳人 酒浮重碧聲低雲葉香趁霞裙准擬魁星歸

去他時相會金門

浣溪紗

壽方推川

占得登高一日先跨雲來作地行仙天將黃菊助長年
健筆已凌枚叟賦高懷欲著祖生鞭駸駸影組向甘泉

臨江仙

鄧鹽生日

向日鵷行瞻鳳彩共朝直上金鑾却來持節海雲邊身
兼三使者名是一仙官漢室中興高密冠千年苗裔
蟬連左弧嘉慶僊祥煙橘中招四老同醉酒如泉

又會黃魁

北斗南頭雲送喜人間快覩魁星向來平步到蓬瀛如
何天上客來佐海邊城方伯娛賓香作穗風隨歌扇
涼生且須灩灩引瑤觥十年遲鳳詔萬里寄鵬程

又稚川生日

釣瀨懷珠山韞玉謫仙至自蓬萊他年勲業上雲臺棣
華開幕府蓮沼屈英才南極隆光秋爛爛門闌香霧
縈回須將壽卉薦瓊杯籬東明日菊借取一枝來

又

煙湊橫嵐霞抱日望中衰草稠稠西風吹恨著扁舟馬
卿多病後方寸不禁秋頗念銀壺行綠醕共聽漁子
清謳夢魂飛過海山樓人隨秋易老情寄水東流

又 傅文生日

千呂青雲垂寶露結鄰恰挂初絃瑞光騰踊雜非煙騎
箕瞻鼻祖孕昂控胎仙勲業子卿全漢節壯懷久寄
林泉舉觴低唱臉舒蓮壽高人七十果熟歲三千

又 壽周材

瓜峽繇繇儲慶遠間平代有名人一襦五袴說朱輪雲
達鴛綴近雷社虎符新 政是泗濱浮磬日潘輿一粲
欣欣鸞歌飛起杏梁塵巢蓮龜問歲介壽酒融春

又 送羅倅偉卿權新州

遠駕星屏臨百粵康沂戶戶歌功使君五馬去乘驄賣
刀無曠土贈扇有仁風 莫唱渭城朝雨曲片帆時暫
西東促歸行拜紫泥封雲霄先步武三接未央宮

江城子

餞黃勉

當年提筆上詞壇
琅玕湧波瀾
晁董聲名一日滿
人間底事
遠煩騏驎足
梅嶺外
硯雲邊
元戎傾蓋有餘歡
酒杯寬
語離難
只恐江濱
明日起青翰
暫去平分風
與月迎
細札步金鑾

又

黃憲生日代作

江如羅帶抱山青
好風輕五雲橫
北斗南邊
曄曄使華星
兩路平反多少事
培吉德
賚長生
當年烏府振冠

纓稔英聲起鵬程
垂上丹霄回首志
澄清雪片深深梅
著子歸路近看和羹

醉蓬萊

代上陳帥生日

正中秋初過重陽
相近金莖多露玉
燕開祥喜氣浮庭
戶覽鳳千峯驂鸞
八桂未展青雲步
碧玉簪邊紅蓮池
上羽仙旁午
少日聲名珠璣黼黻
暎暎分符喧轟持
斧帶緩裘輕足遠
人襦袴唇注櫻桃
腰欺楊柳歌舞新
蠻素滿酌金缸壽
公千歲東臺西府

滿庭芳

代上陳師生日

昂宿光芒德星家世當時飛舞華旗風清玉宇珠露綴
瑤枝八桂蒼蒼聳壑問椿木同數秋期黃堂上油幢轉
影美酒注金卮英纏名字早青箱傳學黃絹摘詞說
江東治行召杜肩齊畏愛雙行五管收繡斧却把旌麾
歡聲沸明年此日公在鳳凰池

千秋歲

代上帥宅生日

顏朱鬢綠天與穰穰福旄鉞貴崇湯沐華軒魚映錦紫

詰鸞迴幅為壽處玻璃鑿落斟醽醁
瑞霧蟠華屋露
泥秋蘭馥香篆起歌裙簇衣斑丹穴鳳色潤東牀玉鸞
共鶴年年來聽神仙曲

眼兒媚

黃堂風轉碧幢開笙鶴九天來三冬愛日一方惠露人
在春臺
持盃多贊松喬喜低唱列金釵明年此日紫
微垣裏光應中台

鷓鴣天

胡提舶生日

月上初弦映左弧霞吹六琯轉璿樞日邊遠近瞻新渥
天下中庸系兩都犀獻角蚌迴珠皇皇星節燭扶胥
滿斟北海樽中酒請壽安期澗底蒲

長相思

朝思歸暮思歸塞鴈三年不見飛斷腸天一涯千思
歸萬思歸夢到窻前拂淡眉覺來雙淚垂

又

柳青青酒清清雨脚淙淙憶渭城一尊和淚傾山青

青水清清水閣山重不計程愁堆長短亭

好事近

別傅文

柳岸碧漪深底事催人行色無計曲留情話只別愁如
織小蠻樊素兩傾城幾度醉狂客明日扁舟西去聽
歌聲不得

點絳脣

別憲帥

天末相逢醉中不訝車茵污一聲鳴櫓驚散眠沙鷺
我是行人却送行人去聽金縷莫辭甘醕別淚飛寒雨

南歌子

童嶺作

雲拂山腰過風吹雨點來田園好處有池臺記著相逢
時節海棠開蝴蝶那無夢鴛鴦亦有梅藏鈎解佩兩
三杯明日水邊沙際首空回

好事近

爛漫海棠花多謝東君留得眉壽堂邊風景與蓬瀛咫尺
桃紅李白競爭妍綠野盡春色只欠櫻唇清唱怕
行雲南北

盤洲文集卷七十九

欽定四庫全書

盤洲文集卷八十

宋 洪适 撰

樂章三

生查子

盤洲曲

帶郭得盤洲勝處雙溪水月榭間風亭疊嶂橫空翠
團樂情話時三徑參差是聽我一年詞對景休辭醉

二

正月到盤洲解凍東風至便有浴鷗飛時見潛鱗起
高柳送青春春在長林裏綠萼一枝梅端是花中瑞

三

二月到盤洲繁纈盈千萼恰恰早鶯啼一羽黃金落
花邊自在行臨水還尋壑步步肯相隨獨有蒼梧鶴

四

三月到盤洲九曲清波聚脩竹蔭流觴秀葉題佳句
紅紫漸闌珊戀戀鶯花主芍藥擁芳蹊未放春歸去

五

四月到盤洲長是梅黃雨屐齒滿莓苔避濕開新路
極望綠陰成不見烏飛處雲采列奇峯絕勝看廬阜

六

五月到盤洲照眼紅巾感勾引石榴裙一唱仙翁曲
藕步進新舩關楫飛雲速此際獨醒難一一金鍾覆

七

六月到盤洲水閣盟鷗鷺面面納清風不受人間暑

彩舫下垂楊深入荷花去淺笑擘蓮蓬去却中心苦

八

七月到盤洲枕簟新涼早岸曲側黃葵沙際排紅蓼

團團歌扇疎整整爐烟裊環坐待參橫要乞珠絲巧

九

八月到盤洲柳外寒蟬懶一掬木犀花泛泛頗黎盞

蟾桂十分明遠近秋毫見舉酒勸嫦娥長使清光滿

十

九月到盤洲華髮驚霜葉緩步遶東籬香葉金重疊
橘綠又橙黃四老相迎接好處不宜休莫放金尊歇

十一

十月到盤洲小小陽春節晚菊自爭妍誰管人心跡
木杪簇芙蓉禁得霜如雪心賞四時同不與癡人說

十二

子月到盤洲日影長添線水退露溪痕風急寒蘆戰
終日倚枯藤細看浮雲變洲畔有圓沙招盡雲邊鴈

十三

臘月到盤洲寒重層冰結試去探梅花休把南枝折
頃刻暗同雲不覺紅爐熱隱隱綠蓑翁獨釣寒江雪

十四

一歲會盤洲月月生查子弟勸復兄酬舉案燈花喜
曲中人半酣漆酒留羅綺車馬不須喧且聽三更未

阮郎歸

澄清閣下藕如船扁舟曾采蓮向來辛苦疊青錢而今

知幾年 人去也客凄然
酒泉添淚泉一杯今夜且留
連斷腸芳草邊

浣溪沙

席上別王巨濟先是兩姬免冠王奪兩
秋繼以章罷

丹桂飄香已四番
杖藜攜手自今難
黯然離恨滿江干
壁上兩冠元是識
花前雙韻幾時彈
中秋後夜與誰
看

滿江紅

暮雨蕭蕭飛敗葉
增添秋色登高會
癡風吹散山居嘉

金史已居名
卷八十
客人世難逢開口笑老來更覺流年迫到於今黃菊滿
園開無人摘珠履湊銖衣窄紫翠裙催牙拍索松兒
添半戰酣相嚇橘綠橙黃時節好舞停歌罷門牆隔酒
醒時枕上一聲雞東方白

又鄭憲席上

累月愁霖知今夕是何天色秋老矣芙蓉遮道黃花留
客長有霜螯來左右誰言櫪馬能煎迫眇高穹重疊起
頑雲星難摘羅綺盛牕軒窄心已醉肩須拍更十分

行酒再三相嚇鳳詔十行歸路近桂華千里明年隔越
閒時樓上共凝眸蘆花白

臨江仙

盤洲餞漢章

兩載繡衣頻駐節金蓮曾印青苔匆匆歸去壽瓊杯曲
終揮別淚江上片帆開記得秋宵山吐月酒酣同上
層臺杖藜何日解重來相思憑過鴈飛送一枝梅

浣溪沙

景廬以米書眉間一點黃之曲餞送鄭憲因用其韻

舉目霜林葉葉黃使星歸騎未須忙煙鬟千疊弄殘粧

內殿恩光承雨露外臺風力挾冰霜應懷三徑雜花香

又席上再作

不見丹丘三十年青山碧水想依然自驚綠鬢已蒼顏
月在柳梢人徑醉雨荒院菊有誰憐繡衣歸與故人
言

生查子

姚母壽席以龜游蓮葉盃酌酒

碧澗有神龜千歲游蓮葉七古來稀壽母盃頻接

繡衣牽綵衣喜慶相重疊
龜紫萃孫曾鶴髮何須鑷

又枕上作

貪看端木花難辦
銷金帳庭下舞瓊瑤
飛到鬚眉上
衰病不禁寒對景
頻惆悵夢寐到凌風
倚著青藜杖

鷓鴣天

席上賞牡丹用景裴韻

莫問甘醪濁與清
試將一酌破愁城
海棠過後荼蘼發
堪嘆人間不再生
心已老眼重明
嫣然國色帶朝醒
耳邊聽得蘭亭曲
一詠流觴已有名

又 十九孫入學因作小集次景裴韻

兩塾絃歌日日春不容坐席更凝塵常思芳桂攀燕賓
未見童烏繼子雲 流慶澤仰家尊揀荒陰德過于門
從師已是平原客毛遂懷繡作弄孫

好事近

春意漸盈盈窗外小桃堪折若問得人憐處是輕顰時
節 主人特地出紅粧不要雲心月三徑雖然冷淡有
采蓮舟楫

滿江紅

春色匆匆三分過二分光景吾老矣坡輪西下可堪弄
影曲水流觴時節好茂林脩竹池臺永望前村綠柳蔭
茆簷雲封嶺蜂蝶鬧煙花整百年夢如俄頃這回頭
陳迹漫勞深省吹竹彈絲誰不愛焚琴煮鶴何人肯盡
三觥歌罷酒來時風吹醒

又立夏前一日景廬借坡公韻

雨澁風慳雙溪悶幾曾洋溢長長是飛霞散綺岫雲凝

碧脩袂歡游今不講
流觴故事從何覓
待他時水到却
尋盟籌輸一
燕舞倦鶯吟畢
春肯住纔明日
欠池塘
綠皺小荷爭出
童子舞雲渾悵
望吾人提筆誰
飄逸記
去年脩竹暮天
寒無縱跡

又

和徐守三月十六日

雨過春深溪水漲
綠波溶溢桃李是
楊花吹絮草茵凝
碧駒隙光陰身易
老槐安夢幻醒難
覓筭六分春色五
分休纔留一
鴈驚靜文書畢
塵外趣壺中日喜
蘭亭

修楔郊坰收出合璧連珠同嘯詠怒猊渴驥尤清逸酒
斟時梁上暗塵飛無痕迹

又 答景虛

衰老貪春春又老尊罍交溢凝目處清漪拍岸四山堆
碧白也論文情最厚維摩示病心難覓到盤洲車騎太
匆匆觴浮一春再見官期畢歸路近長安日奉清時
明詔送回更出上殿風霜生頰齒元龜獻替圖無逸記
而今杖策過溪橋留行迹

又 黃堂席上答太守

燕寢香凝官事了詩情充溢歸後院花容爭媚柳眉添
碧老子胡牀常自歎輕裙長袖從何覓探城樓此際夜
如何更籌一人已老春將畢臨曲水纔旬日快朝來
雨過魚兒爭出淡酒一杯空酩酊黃堂千騎真安逸問
朱幡何日到丘園聯棊迹

又 席上答葉

百計留春春不住愁懷填溢爭如對寶梳鑒鬢翠環鋪

碧紫綬金章都是夢雲廬花塢如何覓勸金杯淺笑傍
賓筵須均一前夜月新離畢收澁雨呈紅日荷主人
情重五雲齊出一顆櫻桃天付與數聲水調人飄逸歎
荒園三月百花殘無蹤跡

南歌子

雪中和景裴韻

閨歲饒光景中旬始打春擁爐看雪酒催人梁上不曾
飛落去年塵未暇巾車出何妨舉盞頻斜川日月已
成陳想得前村仙子晚粧勻

又呈葉憲

多病都緣老寒陰可惜春栽桃種竹怕因循移轉籃輿
藤杖未開門真率須如約安排欲效顰莫將箏笛損
精神自有啼鶯舞鶴解隨人

又示景裴弟時葉憲明日率真

頑健輸村老嬉遊付後生
七旬纔有五清明須趁良辰
美景遶園行雲意將飛雪
天心未肯晴難將性命作
人情只合擁爐清坐閱醫經

又喜晴用前韻

住得如篩雪方欣有脚春誰云三尺不須尋若是詩僧
月下許敲門 鉅竹多中斷殘梅競小顰畦丁說與主
林神掃洒板橋前徑待吾人

又

示裴弟

強作千年調難踰五度春脊令繼踵漫相循休要關心
樂裏也扃門 蕙帳銀杯化自謂紗窻翠黛顰謂弟燒
香試問紫姑神一歲四并三樂幾多人

又 寄景廬

南浦山羅列東湖水渺瀰主人好客過當時斗轉山橫
時候醉如泥 莫管鶯聲老從他柳絮飛野園春色別
無奇船上有花多酒未須歸

好事近

席上用景裴詠黃海棠韻

睡足淡梳粧喜見詩人元白不覺艷紅妖紫壞花仙飛
格 須知玉骨本天然不是借人力准擬小春重看望
秋灰無射

卜筭子

太守席上作

五鳳望中仙
五馬人間貴
舞態歌聲盡
出羣烏鵲巡簷
喜
昨夜值狂風
痛飲元無味
說與譙門漫打更
却怕
催歸騎

滿庭芳

辛丑春日作

華髮蒼頭
年年更變
白雪輕犯雙眉
六旬過四七十古
來稀
問柳尋花興懶
拈筇杖閒遶園池
尊中有青州從
事無意
喚瓊螭
人生何處樂
樓臺院落吹竹彈絲奈

壯懷銷鑠病費醫治漫道游魚聽瑟絃綠綺山水誰知
盤洲怨盟鷗間濶瘞鶴立新碑

又 酬徐守

風攬花間雨慳柳下人人懶拂愁眉年荒省事投轄井
中稀架上舞衣塵積絃索斷箏鴈差池南柯夢轉頭陳
迹飢鼠穴空鼻新年官事少秋蛇春蚓重疊烏絲更
出奇花判百病都治報道行厨辦也烏鵲喜龜鶴前知
更書近鴈行浸遠長對去思碑

又

酬葉憲

殢酒消愁逢塲作戲何曾擇地
伸眉詩筒來往如我與君
希喜得青春有閨添日月
款曲臨池盤洲有山肴野
蔌安用設鷄彘老來空自笑
一頭梳雪兩鬢吹絲便
常逢社飲聲不堪治曾就
新年真率花神報蜂蝶皆知
東風惡江梅欲盡薦福莫
轟碑

又

和葉憲韻

柳徑花臺熙熙春動游人珥
墮簪遺枯藤到處綠刺惹

冠衣雪後園林更好瓊作珮香滿橫枝巡簷久留連一
笑不管午陰移盤洲今雅集皇華飛蓋揮塵遲遲覺
龜魚增價草木生輝梁上不教塵落談文字酒散星希
明年好玉津隨駕回首記襟期

又

再贈葉憲

同病相憐凍吟誰伴漫懷舉案齊眉槐安夢境一笑自
來希未到斜川見雪春飲半尚壓銅池今思古拊盆擊
筑蠆鼎問變爨何時天意解並游花塢旋掃蛛絲對

壺中閒日冗牘休治四坐同盟情話飛玉塵萬事多知
杯盤省淺斟隨意真率視前碑

又

答景盧遺懷

蝴蝶夢魂芭蕉身世幾人得到龐眉十分如意天賦古
今希晝日猥叨三接摩鵬翼曾化鯢池槐陰下深慚房
魏那敢作封彛鴈行爭接翅北門炬燭西掖綸絲幸
歸來半世園路先治漁唱樵歌不到鶯燕語何畏人知
編花史脩篁千畝封植具穹碑

又 酬趙泉

春日花畦雪迷筠塢柳梢未肯低眉泥深路滑車馬往
來稀平地瓊瑤盈尺冰凍解澹水如池皇華喜爭添泉
貨不鑄尚方爨 光陰駒過隙髭髯如戟容易成絲把
詩盟長講酒病休治兩兩垂螺舞徹藏羌管人已潛知
檣烏轉錢流地上褒詔便刊碑

又 酬趙憲

當國無功歸田有分四山濃抹煙眉春雲多變清晝惠

風希欲踵蘭亭故事溪水漲簷盍鵞池臨脩竹一觴一
詠考古到辛彝當時龍袞側親聞臚句天語如絲漫
三年博士局冗爭治底事繡衣留滯青天瑞奴隸皆知
迎歸詔鸞臺鳳閣名記壁間碑

又 再作

草閣煙橫花蹊雨潤傷春誰畫鴉眉藥囊未減尊酒自
然希堪歎雲和挂壁絃半絕鼠噬龍池投壺罷憑欄玩
古羅列父丁彝龜巢添綠皺殘梅片片新柳絲絲恨

風狂折竹鶴病誰治自信年衰景短甘冷淡應也天知
塤簾奏清歌醉墨一一上圭碑

又

景廬有南昌之行用韻惜別兼簡司馬漢章

雨洗花林春回柳岸窻間列岫橫眉老來光景生怕聚
談希何事扁舟西去收杖屨契濶魚池流觴近詩筒整
歇焉用虎文爨良辰懷舊事海棠花下笑摘垂絲歎
五年一別萬病難治幾處繡衣塵跡歌舞地烏鵲曾知
君今去珠簾暮捲山雨拂崇碑

漢章作山雨樓
景廬為之記

又 再作寄盧景

舊日盤洲藏鉤卜夜松兒笑揀雙眉老人好靜此樂數
年希尚記乘舟西遡樓卷雪曾到雷池今非昔畏寒閉
戶棄擲夏商爨入春踰兩月輕煙非霧細雨如絲任
風顙花架不憚裝治想得醉吟滕閣家園事爭解詳知
歸來好猿驚鶴怨孤負輞川碑

望江南

荅徐守韻

嗟故歲夏旱復秋陽十雨五風皆定數千方百計為災

傷小郡怎禁當 勞撫字惠露洽丁黃田令吹煙常蔽
野居民安堵不離鄉祖道免齋糧

又 再作

傾蓋侶古語誦鄒陽曲水一觴今意懶陽關三疊重情
傷離恨落花當 人截鐙歸騎莫倉皇誰肯甘心迷簿
領不如袖手傲家鄉高枕熟黃糧

西江月

雪中

小室坐氈重疊紅爐獸炭交加一卮村酒吸流霞窗外

寒威可怕 心在盤洲種柳眼看密雪飛花銀杯縞帶
不隨車江上漁蓑難畫

又 再作

席上酒杯難減鼎中藥味頻加老人爭得臉如霞鏡裏
衰容人怕 簷溜盡成冰柱前村變却梅花瓊瑤破碎
為行車凍雀盈枝堪畫

盤洲文集卷八十

欽定四庫全書

盤洲文集附錄

宋尚書右僕射觀文殿學士正議大夫贈特進洪
公行狀

曾祖炳贈少保曾祖母何氏贈紀國夫人祖彥
先贈太師秦國公祖母董氏贈秦國夫人父皓
徽猷閣直學士贈太師魏國公諡忠宣母沈氏
贈魏國夫人本貫饒州鄱陽縣年六十八

公諱适字景伯其先徽州人唐末避亂徙樂平之洪巖
世以耕桑為業自高祖府君士良篤義方之訓力教子
孫每以事過郡至湓潭愛其山朝水抱可卜宅兆則鄭
重求之立庾屋其上為往來貯儲地疾革命家人曰葵
我必於彼後世青紫當不絕越十六年為元豐乙丑長
孫給事中彥昇遂以進士起家是為公伯祖又三十年
政和乙未曾孫忠宣公繼之是為公皇考又二十七年
紹興壬戌公與介弟文安公遵中博學宏詞科後三年

仲弟今敷文閣待制同修國史邁繼之給事之後官者
七忠宣之弟姪官者九子孫曾孫官者二十六忠宣嘗
歎曰秦氏置我死地曾祖潛德燾後而祿章無因齎恨
泉下矣公初除執政即當轉官句高祖卹典上惻然從
之諸公議以大夫告第既有尼之者遂寢公為兒時已
穎異十餘歲日誦三千言忠宣連缺因寓嘉禾及使
北公年才十三已能顯任門戶時值敵騎犯吳間關奉
秦國魏國挾五第三妹歸鄱陽指衆食貧忠宣奉入在

秀復迎挈以往凡九年而魏國棄諸孤忠宣又久留朔方公茹悲含辛破涕自力以奉秦國之歡躬率三弟刻意問學為文自出機杼皆中程度一時名人多折輩行與之交外氏居無錫公奉魏國之喪往依以葬時河南復為王土嘗擬宰臣賀表有宣王復文武之土光啟中興齊人歸鄆謹之田不失舊物之句仲舅博士沈公松年一見奇之勉以為宏博之習初用出使恩得修職郎監南獄廟調嚴州錄事參軍浙西提舉常平司幹辦公

事既以詞科賜第宰臣進讀制詞太上皇曰父在遠其
子能自立為可嘉宜與陞擢差遣於是為勅令所刪定
官改左宣教郎入秘書省為正字才數月忠宣南歸以
直忤秦檜即去國公以奉親自列通判台州將終更忠
宣有英州之謫台守與公不相能嘗行縣至黃巖令以
繫囚十數輩匿堂廡間詭以獄空告公坐令聽事聞大
呼聲即詰視諸囚皆叫號稱冤因備其事申諸司歸白
守守以為不關白長官撰彈文迎秦意秦諷言官上之

坐免官往來於英以奉忠宣溫清里門聚食數百指皆仰給於公公處之怡然凡九年而忠宣薨服除起知荆門軍以惠愛為政首奏便民四事太抵以均敷茶額錢所出甚於常賦茶商執害民之柄而託更為姦民力重困官田以附種為名而不稼納租麴引失立法之意而重疊出鋸大禮代它州之貢而多方取辦乞罷行之又荆門自兵火後學校廢弛遇大比則附試江陵解額五才得一慨然以作成為已任力請於朝由是軍得自解

發額亦稍增其舊改知徽州先是朝廷立賞鬻官田當
路急於受賞督迫甚峻屬邑一切望風公下車民競赴
愬公曰賞可慕民獨不可愛耶乃戒屬邑有虐吾民者
必劾已而使者罷去民卒得寬郡多訟分產不平者公
究其端以官印關書吏倍有邀索民寧匿關而憚費以
故成訟公下令許民持關立庭下不以蚤莫即時呼吏
印給之無毫髮費舊訟頓息其簡易近民率如此提舉
浙西常平茶鹽事詣闕且對適文安知平江府引嫌當

避乃移節江東嘗奏論役事其略曰元祐指揮合役坐閒人戶不及三番處令雇募蘇軾謂聖恩欲使百姓空閒六年是以紹興二十六年之旨歇役六年者與白脚同行之數年下戶得以寬佚間者宣州守臣有請欲不候六年再差上戶有司誤以歇役六年之文衝改下戶畏避多致流徙蓋上戶稅錢有與下戶相去十百倍者必俟差遍下戶則富家經隔數十年方再執役臣守徽州以婺源一縣言之有差及一貫稅錢者民間哀訴誠

為可念乞仍行二十六年指揮庶使細民鼓舞德澤又如一都之內上等五戶稅錢各五十千中等五戶稅錢各三十千各曾應役若以歇役六年再差恐中等五戶僥倖終免乞自第一戶差至第十戶然後再差所貴役法均平上下稱便人以為切中役法之弊江東實為鄉部公又嘗兼提點刑獄事風采凜然不可干以私逆亮敗盟有旨令沿江監司條具恢復事公上奏謂逆亮既殞大定嗣位未必諸國服從若能仰順天時遣使歸疆則

王師不血刃而得土宇實天下之幸萬一敵衆尚強自
淮以北別無爭立之人則宜多遣有膽力人密傳詔檄
使中原義士各取州縣因以畀之王師但留屯淮泗募
兵積粟以為聲援不必輕涉其地以務力爭俟蜀漢山
東之兵數道俱集見可而進遲以歲月必有機會可乘
恢復故地何翅破竹庶幾兵力不頓可以萬全車駕親
征至建康因上殿陳言江鄉之民以旱荒而遷徙淮南
比遭敵騎之擾復還故鄉則所棄之產已為官司估賣

形勢之缺

者十不償一佃者量納租課無補於官而有害於民乞斷自紹興二十八年以後凡州縣所賣逃產許原業人子孫以原估價就贖專委提舉常平官覺察太上褒予甚飾時待制為右史受命迎使客入對太上前顧其副張掄曰洪某三子其材皆可用公激烈初心念先志之未酬每思盡瘁曰邊防曰民兵曰防江曰積粟曰賑濟流民皆次第為朝廷言之除尚書戶部郎中總領淮東軍馬錢糧當海州解圍又有符離甲申之役

沿淮列戍襁負而歸者踵相躡供億之費數倍於曩時
公以書生從容心計略不見其趣迫之色有旨犒解圍
軍兵而鎮江府前軍之右軍與太平州之武鋒軍以在
圍中獨不預公從權比附且倍其賞軍士莫不驩呼又
以便宜招安海道嘗為過者又謂沿邊已招納降人若
使之飢寒失所則必怨望如蕭扎巴一家餘二十口券
錢最多日不過千六百元尚不給用則其餘可知乞將
已有官人與給料歷進勇副尉與依武勇給券四口或

五口以上亦與添給口食其臨事機識大體類是總所
建治京口名雖淮東而所總多江東浙西財賦嘗奏乞
以浙西江東財賦入御勿復增薦舉添官屬庶名正事
順可以辦集又嘗請於朝皆為戶部所沮公登政府始
請行之淮東至今蒙賴就除司農少卿隆興二年二月
召還改太常少卿權直學士院旋又兼權禮部侍郎上
初講郊丘之儀公建議合進胙德壽宮及改定樂章并
郊回用雅樂與減樂工之冗員皆當於禮而適於時文

安公罷西府公亦上章求去上諭令安職復遣中使賜以珍茗越三日與右正言尹穡同賜對選德殿上顧謂穡曰洪某為人溫粹文詞有用論事皆可行褒獎至於再三穡出驚歎曰聖眷乃如此言者既攻文安雅不欲公留及是始無相撼意閱月除中書舍人湯丞相思退罷免公當草制侍御史鼂公武噴有語公露章求去且乞身於上前甚力上曰前日公武謂思退有罪而卿稱之為大臣制詞中無譴責語乃其死黨朕曰朕令作平詞

非其罪公武執彈章在手乞留榻後已却之仍徙置戶部矣時敵再犯淮甸羽書狎至書詔填委上焦勞至夜分不寐或夕召或細書咨訪公獨當內外制視草之餘應詔密啟默當上心始淮上斥堠不明將帥無申發文
字公奏乞預隄防海道又乞降親征詔以激勵士卒敵既尋盟首為賀生辰使上謂副介龍大淵曰前日洪某侍玉輅見其容貌甚悴豈有聲色之奉耶方欲大用之可諭意令自愛公附奏曰家素無侍妾近以法服執綏

車輅撼頓失其常度咫尺天威有戰慄之色報國之軀
敢不自愛既越境金遣同簽書宣徽院事高嗣先接伴
嗣先之父司空嘗有德於忠宣者故見公加敬且詢先
世甚詳公因遜謝相與驩甚頗得其要領以歸乾道元
年五月除翰林學士仍兼中書舍人輔臣奏例無翰苑
下兼西掖者上曰洪某在後省甚振職且要其整頓綱
紀秦頊提舉太平興國宮公奏秦檜欺天盜柄戕害忠
直當錮其子孫若一人奉祠則其黨與皆有彈冠之望

所謂一葉不去將尋斧柯者矣上即從之故事給舍繳
駁施行者皆封付三省是奏乃以付公明日召對上曰
所論秦壩甚當異日有繳奏只須批勅以來不須聯章
雖朕意所向而不可行者但論之如繳論丞弼之不當
被召余堯弼之不當復職莫汲之不當除編修計議官
議者皆以為當未嘗一為親故干求除授有改秩而避
免作縣別得差遣者雖門下士亦不置以故人服其公
盈旬乞免兼職上曰執政有缺朕今用卿既因繳馬監

崔良輔轉官事上數稱善至乞令大臣討論賞典處上云卿今自作執政可以討論六月除端明殿學士簽書密院事上語參政錢公

端禮虞公

允文

曰三省事與洪

某商量蚤朝遂不先退東西府同班奏事自此始詣德壽宮謝太上皇曰上用卿為執政朕亦謂從官中無逾卿者卿父精忠今人臣所無朕嘗謂蘇武不能及頃歸自敵中欲除執政為秦檜所忌擠排使去上天有報卿兄弟相繼輔政公每遇奏西府事必極意展布至三省

則終不敢出位盡言一日偶及皇甫倜軍告乏戶部祇將椿積錢應副上云無分三省事卿有所見第言之八月除左中大夫叅知政事十二月拜左通奉大夫尚書右僕射同中書門下平章事兼密使明年三月久雨上迎天竺佛請霽減膳却葷公以變理亡狀獨三上章乞罷免且面奏求去上曰春間自是多雨卿奉法守公近年宰執所不及第安職臺諫因論列上隨事諭之諫議大夫林安宅至居家待罪遂以觀文殿學士提舉太平

興國宮明日上謂參政葉公顯曰宰臣奉法守公純誠不欺近年無如洪某者臺諫搜索細故不存公道安得如此人而用之公自西府至相位才旬月而進呈之際多所開陳大抵以誠實不欺為主見有負於國害於民者必正色拒之寧已任怨而必欲使君立於無過之地用人第取實材不采虛譽可予不以疏而棄不可予不以親而私有受薦而終身不知所自者上嘗曰今日可謂存公道卿等所擬無不當可見留意選擇公奏蔣節

嘗語臣無事可論繳臣云前此見行事有特字者皆是非法今不敢下一特字自然無可論繳上曰蔣節亦有此言因奏臣到政府數月見陛下行事未有不循典憲者今蔣節尚欲審特旨常思祖宗故事更願陛下思其所以益崇聖德上曰朕與卿等共守之上欲幸白石教場閱三衛軍馬公奏云閱武固有名第聞三衛潛儲鷹犬外人以為出獵又聞準備麋鹿傳之遠方恐損聖德上曰朕意不如此於是戒諸將不得以鷹犬自隨用兵

後調度不給獻議者欲復免行錢上曰曹泳所行惟免
行一事至今人以為是今日豈可不及曹泳繼是有乞
借房緡收職田立宮觀獄廟額添交子增乳香之直令
諸郡獻羨餘者上以為傷國大體公亦力贊以為不可
行上欲親見問郡守以觀能否公奏乞降旨去闕期半
年令奏事之任自是一經審鑒能否判然諸郡多得良
二千石時有輔郡守獻言欲如漢太守許上計上問可
以行否公曰漢法令長吏守丞歲終上計大略似今攢

帳耳郡守不可以自来惟嚴助以漢廷切責乞奏三年
計不可行人以為善對然公始為執政即奏減機速房
吏人它日又奏乞降旨不得存留三省并密院額外吏
人將上承旨司謝褒者至漏舍堅請存留王興祖等四
人褒之子梓實在四人中公奏朝廷久不治吏互相循
襲無所忌憚乞與放罷編管上然之戶部吏有稽慢公
亦懲治不貲侍郎林安宅上章待罪上曰斷一二吏何
至如此雖聖明可恃而羣小固已愠矣又安宅乞降度

牒千道限廣東一季盡鬻公奏諸路分科甚擾乞減半
付漕司俾從民便無得分下諸郡上深以為然馬司治
馬甲買牛皮五千五百而御前又買五萬內侍復傳旨
下工部買十三萬公奏漕西去年水潦漕司期限逼民
多殺牛納皮上曰如此却是公然使人殺牛軍器所妄
計耳祇買一萬奏曰陛下務農重穀恤民如此天下幸
甚中旨朱彥宗守婺公奏彥宗雖故翊善子而娶長公
主女家居婺此命若出恐駭物聽尋改知泰州殿中侍

御史張之綱論不差陳宋霖華初成事以初成姓名藏
之章疏中公奏白其事上取履歷視之明日曰華初成
數放罷又嘗勒停年已及豈可復使為郡卿敢理會臺
諫事可見無私朕終夕為之喜監察御史劉貢初除公
嘗於上前譽之有術士薛言中出入貢門因為人求官
於密使汪公澈事泄送臨安府會奏事上稱貢能治錢
塘寄因事云適已除殿中侍御史公因斥其過且言除
書未啓當封還上曰卿等如此無隱向來宰執所無貢

遂罷去皇甫坦以方技進嘗與右史陳

良祐

同坐客舍

謁者導陳先坦怒不同升盛嘗謁者奮而來前遽出懷中一餅以獻公擲之地曰君誠有道何不為呂洞賓韜光塵外而僕僕朝市正須仙食非所願麾使出翌日奏曰通國以神仙待皇甫坦不識陛下以為何如人上已先知昨日事笑曰頗能布氣治病耳昨日中宮賜之酒陛辭已大醉語言不倫故如此凡公之所行人多為之岌岌而公奮已直前無所回避林安宅既登諫坡或勸

公為去就以避之公曰主上聖德遠過漢唐之君士患
不逢時今身登宰輔恨無以報國苟一日留有竭吾愚
爾吾於安宅異同國事也患失非所計訖墮其口去國
不數月除知紹興府浙東安撫使在越一歲有半為治
得大體而無廢事不求治賦而用自足吏畏民愛至於
令思之請祠以歸提舉臨安府洞霄宮待制在西掖上
曰觀文在朝肯宣力林安宅懷奸不能容今已三請祠
矣姑從之有大藩闕即復用矣公既歸素不為求田計

閭舍之外得負郭地百畝翦除荆棘列岫如鶩雙溪上下引以為蘭亭曲水之飲渚洲窈深花木映帶位置臺榭隨力興作野服瘦筇終日婆娑其間人視之不知其為丞相也目其地曰盤洲一卉一椽皆有題咏雜親朋醕倡為一帙曰盤洲編平生澹泊老猶嗜書不倦晚歲為文益古軼出西京之上尤好漢隸略去筆墨畦逕而落紙典型深得東京用筆意治越之暇訓釋考證博極古書為隸釋一書廿七卷嗣有附益為隸續廿一卷其

後時有刪潤合釋續為一而是正之以屬越帥刊行為
書史失去不復存副本公每以為恨有文集一百卷藏
於家淳熙十一年二月二日薨於正寢公自撰遺表至
是上之天子震悼贈特進官其後如格爵至鄱陽郡開
國公食邑五千二百戶實封二千六百戶娶沈氏封萊
國夫人左中大夫復之孫即太學博士松年之女魏國
夫人之姪先五年薨公為墓銘效漢人立雙闕因自作
小傳俾後人刻其上男九人櫬朝奉郎通判興州松承

議郎通判光州榴蚤亡楷文林郎池州建德縣丞攢宣
教郎知隆州府武寧縣桴故承事郎楹承奉郎監漢陽
軍酒稅棟早亡榔承奉郎監台州商稅務女三人長欲
嫁而卒次歸及之次嫁承議郎知袁州宜春縣薛紹孫
二十人倬承務郎監筠州新昌縣須稅儼伋皆承務郎
伋監舒州山口鎮僖倬倬僑倬倬倬倬倬倬倬倬倬倬
倬倬一未名孫女十人長適迪功郎隆興府武寧縣主
簿楊汝明次將仕郎權當國次承務郎監鎮江府江口

鎮稅張履信餘皆在室將以明年三月甲申葬於郡四
十里徐村之原合萊國墓興州君錄公事狀俾及之詮
次以備太史氏之采擇公為總賦屬文安擇壻及之為
隆興元年進士實文安領貢舉公以文安之言信之不
疑一見即相器重出疆辟使為屬既而以疾辭虞雍公
在政府復兩學官闕欲以及之及之辭公曰茲我意也
可以見予之所存矣顧錄錄州縣且二紀有負期待前
年冬解秩公宜紆道往省公喜見顏際從容餘月垂別

戀戀閏月未再而公之訃聞矣嗚呼今尚忍言之及之
自登公門頗聞忠宣公之往行為詳而公之忠鯁誠實
實似之與人交無長語而情好周盡收拾孤幼周卹賤
貧為已責而不為已恩薦舉必首寒素不為勢利所奪
涉於欺誕者雖已舉而猶劾之郊當奏長孫念渭陽之
恩未報密以表弟沈自強之名聞命下子弟族黨方知
之終其身餉客不隨俗之好惡為侈具書札往復不貸
一荷幅溢語閒居十六年未嘗通朝士書雖宰執除拜

賀絨亦不講晚遇英主驟登宰輔曾幾何時而秘殿珍
祠優游綠野天日臨照始終不渝非公之忠實不欺疇
克爾耶諸子稟公之訓悉從常調試邑顓厚能自持諸
孫詵詵多秀發或者用不盡之器業其在於斯乎待制
方膺上異眷顓付史事及之辭不獲命乃撫其凡而次
叙之若其詳則有公之奏藁語錄在公初名造字溫伯
一字景伯云淳熙十二年十一月日壻許及之謹狀

欽定四庫全書

附錄

宋宰相贈太師魏國洪文惠公神道碑銘

周必大撰

公姓洪系出共工氏後避仇以洪易共三國有廬江太守矩唐有集賢學士孝昌五季自歙徙饒州樂平又七世始居鄱陽隱德田間至公高祖士良力教子孫以學愛涵港山川而置倉焉命其子曰他日葬我倉下青紫當不絕後十六年元豐乙丑孫彥昇果以進士起家事徽宗歷三院御史至給事中徽猷閣待制遂為大家公

之曾祖諱炳贈少保妣紀國夫人何氏曾祖太師秦國公諱彥先給事弟也妣秦國夫人董氏父諱皓政和乙未進士後徙樂平之洪巖仕至徽猷閣直學士贈太師魏國公諡忠宣母魏國夫人沈氏公初名造字溫伯一字景溫後改名适字景伯幼穎異日誦書三千言忠宣公自嘉禾司錄應選使朔方公年十三已能任家事率五弟三妹奉祖母及母避亂歸饒母亡復過嘉禾食忠宣之祿日夜帥長弟文安公遵次弟翰林學士邁種學

績文至忘寢食用父出使恩補修職郎監南嶽廟調嚴
州錄事參軍浙西提舉常平司幹辦公事紹興十二年
與文安公同中博學宏詞科宰臣進呈所試制詞高宗
曰父在遠子能自立可嘉宜與陞擢遂除勅令所刪定
官後三年翰林公亦中選由是洪氏文名滿天下改左
宣教郎入秘書省為正字才數月忠宣公歸自朔方以
忠言忤秦丞相檜斥補鄉郡公亦出通判台州將滿而
忠宣公以散官謫英州台守觀望擬彈文納當路轉示

言者以為風聞坐免官往來嶺南供子職閔九年秦薨
忠宣北歸亦道卒服闋起知荆門軍公才智有餘臨民
惠愛二十八年應詔上寬恤四事凡公私以例取民錢
歲數千緡悉除之郡久為盜區大比士附江陵試解額
僅存五之一公作成日衆乞自闕試闡稍還舊額繼有
登科者改知徽州會鬻官田監司慕賞迫州縣公獨寬
之初至訟析產不平者紛然公曰此吏求賂不印闕書
之過也命人戶毋拘早晚齋書庭下立為印給其訟遂

絕為政得要類此范文穆公成大來為戶掾公一見知其遠器勉以吏事暇則商榷著述自是范公官業文筆高一世每德公云擢提舉浙西常平茶鹽會文安公守平江易江東路嘗兼提點刑獄蓋鄉部也持正不私風采振厲二十二年車駕視師金陵公因朝覲言本路昨旱荒民逐食淮南復困邊兵今雖懷鄉而田產官已斥賣不即給佃乞斷自二十八年後許業主若子孫用估價贖還天語褒飾再三時翰林被命迎使客上曰洪某

三子皆可用也公於是歷陳邊防民兵積粟振民等事朝廷益知其才除尚書戶部郎中總領淮東軍馬錢糧孝宗即位海州解圍符離用兵供億繁夥公心計周密暇裕如平時會有旨犒海州之師鎮江及武鋒軍有實在圍中而不與名公比附倍給以便宜招納海道逃卒歸之督府歸正者接踵而至或無以贍其家因公奏乃計口添支公謂以總領淮東為名而財賦實隸浙西江東乞以兩路入銜後公登二府竟行其說迄今便之隆

興元年就遷司農少卿明年召貳太常兼權直學士院
又兼權禮部侍郎上初講郊祀公乞進祚德壽宮及改
定樂章汰樂工冗員人謂禮與時兩得之七月文安官
罷西府公即求去上遣使賜茶諭令安職尋因夜直同
右正言尹穡召對上稱公溫粹文詞有用論事可觀穡
先頗睥睨公知上眷乃已九月除中書舍人內直如故
湯丞相思退免侍御史晁公武論公草麻無譴責語公
亟請外上曰公武言卿黨思退朕謂平詞出朕意固却

其章仍徙戶部侍郎矣方羽檄交馳書詔填委或夜召或細札咨訪公獨當內外制時時奉詔言事如乞防虞海道降詔親征多契聖心大用之意已定敵既講好首命公為賀生辰使北遣同僉書宣徽院事高嗣先接伴自言其父司空有德忠宣相與甚歡得其要領以歸乾道元年五月除翰林學士仍兼中書舍人大臣奏翰苑不應下兼掖垣上曰洪某在後省振職欲其整頓綱紀耳秦頊予祠公執不可上徑批依奏封以付公明日賜

對宣諭曰卿論秦墳甚當雖朕意所向不可行者第言之巫伋被召余堯弼復職莫汲為密院編修官公皆繳奏而止又奏免外制上曰執政有關朕將用卿公因繳馬監崔良輔轉官乞令大臣討論賞典上極稱善且曰卿且執政自可討論六月遂除端明殿學士僉書樞密院事上諭參政錢端禮虞允文曰三省事與洪某商量東西府始通班奏事公赴德壽宮謝高宗曰上議用卿吾謂從官中無踰卿者况卿父精忠古今所無頃欲大

用阻於秦檜令卿兄弟相繼入輔此天報也八月以左中大夫叅知政事十二月拜通奉大夫尚書右僕射同中書門下平章事兼樞密使公自僉樞旬月入相感激異知任怨革弊以誠實不欺為主人才可用疎遠不棄不然雖親舊弗予上每稱其心存公道進擬無不當公奏中書舍人蔣芾語臣無事可繳臣答云凡降旨云特者皆非法今一切無之上曰芾亦及此且謂特旨宜審公奏陛下動遵成憲願思芾言益崇聖德上曰朕與卿

等共守之駕幸白石教場閱三衛軍馬公前奏將帥有
潛蓄鷹犬備狩獵者上即呼諸將戒諭初議召見郡守
觀其能否公言舊惟見闕馬今乞闕遠近並令半年前
奏事之任遂為定制二千石多得人矣公自執政即奏
減機速房吏三省樞密院毋留額外人有承旨司謝褒
者力乞存留四人其子存焉公怒取旨編置政府久不
治吏上欣然以為允戶部事有稽慢公追主令治之侍
郎林安宅上章請罪既又欲給度牒千道付廣東期一

季盡鬻公請減半仍戒科擾安宅滋不悅馬軍司乞牛皮五千餘為馬甲御前拋買五萬工部別得旨市十三萬公奏數多限迫上曰軍器所妄計是使人殺耕牛也第買一萬而已中批朱彥宗知婺州公言此資善堂翊善朱震之子雖可與郡然彥宗娶潘氏乃婺州長公主家遂改泰州二年殿中侍御史張之綱論陳宋霖當與差遣而潛附所厚華初成於其中公發其姦上視初成履歷曰屢放罷又嘗停官且年已及豈應與郡卿敢及

臺諫可見無私朕終夕為之喜劉貢初除監察御史公
賛上得人會術士薛言中同貢子為人求官於樞密使
汪澈汪送有司上未知也早朝上稱貢能治錢塘寄因
已批出遷殿中公與執政及薛言中事且云除書未啟
當封還上曰卿等如此無隱向來宰執所無之綱尋以
憂去貢遂罷方士皇甫坦謁公公薄具其禮坦怒云云
公責之曰君誠有道胡為出入宮禁妄談禍福耶明日
公奏通國以神仙待坦陛下謂坦何如上已知公責坦

笑曰頗能布氣治病昨日宮中賜酒醉語已無倫矣公
既疊忤言路適林安宅為諫大夫或勸公引避公曰吾
與安宅異同國事也上知吾忠豈可患失逆為去就乎
適春霖公引咎乞退上曰春自多雨卿第安心安宅遂
與臺官合辭論公上不聽安宅至家居待罪公亦力請
上不得已三月辛未除公觀文殿學士提舉江州太平
興國宮而謂參政葉顥曰宰臣奉法守公誠實不欺無
如洪某重違言者耳不數月起知紹興府浙東安撫使

治得大體復勤小物軍民安之閱歲有半提舉臨安府
洞霄宮時翰林在西掖上語之曰賢兄三請祠姑聽暫
間公素不營產業自越歸得負郭地百畝因列岫雙溪
之勝位置臺榭引水流觴種花藝竹命曰盤洲一椽一
卉題詠殆徧安居十有六年身名俱榮子孫滿前近世
備福鮮及公者淳熙十一年二月辛酉薨於正寢前自
撰遺表上之享年六十八爵鄱陽郡開國公食邑五千
二百戶實封二千四百戶初贈特進諸子遇恩累贈太

師魏國公娶沈氏太學博士松年女追封魏國夫人母
夫人之姪也先公五年薨葬郡四十里徐村之原公為
墓銘效漢人立雙闕因自作小傳俾後人刻其上明年
三月甲申諸子奉公柩合葬焉男九人長槻朝請大夫
新知贛州江南西路兵馬鈐轄次杳朝請大夫新知南
劍州摺早亡彬朝請郎權發遣長寧軍檟朝請郎前軍
器主簿桴故承事郎楹朝奉郎新知慶元府定海縣棟
早亡楫通直郎前權僉書荊門軍判官廳公事女三人

長早卒次適通奉大夫同知樞密院事許及之女前卒
次適朝散大夫兩浙西路提點刑獄公事薛紹孫二十
四人倬承議郎江南西路提點刑獄司幹辦公事儼故
承事郎知常德府龍陽縣丞伋奉議郎荆湖南路提舉
茶鹽司幹辦公事偲承事郎新知江州瑞昌縣僚承事
郎甫承事郎新提領建康府戶部贍軍酒庫所幹辦公
事僑偁承務郎新監建康戶部大軍庫門僊承事郎
新權僉書漢陽軍判官廳公事傅將仕郎佃憊仔休儉

傳承事郎新監無為軍崑山鎮伉俊仁倣承事郎佑倣
倣女孫十二人適文林郎前廣南西路轉運司主管帳
司楊汝明修職郎新無為軍巢縣主簿權當國通直郎
兩浙東路提舉常平司幹辦公事張履信鄉貢進士程
洋承務郎張鏐將仕郎邢諤將仕郎王待問進士高倣
迪功郎新信州弋陽縣尉王元春餘在室曾孫男五人
芾蘊將仕郎蘭蘧荀曾孫女一人公器業早成與人交
誠實無浮禮文華天賦濟以力學步驟經史新奇富贍

兄弟鼎立自成一家罷政後論著益多四方傳誦有盤
洲集八十卷尤耽嗜隸古為纂釋二十七卷隸續二十
一卷屢加刪潤合為一書將踵歐陽文忠公集古錄趙
明誠而下弗論也必大早與文安及翰林同朝公由常
平入對始識公又嘗與贛州為僚金陵故其子孫以副
樞許甥狀請碑墓道先是太常以文惠易公名文固然
矣壬辰夏予奉祠過饒適連年水旱流移系道公宗支
繁庶或不自給人人言相君賙我且及恤貧已責事甚

詳夫居家均惠若此在公固可知矣遇蔭補捨長孫密奏表弟沈自強酬渭陽之恩命下乃知是皆宜書銘曰思文孝宗雲漢章天有臣洪公優於代言孝宗神武志平北路公踐帷幄言整軍旅帝方克勤如日運行公總衆職甚稱上心帝推至公天無私覆相業伊何才能是授謀皆予同德惟乃知周旋二府僅越三時保釐東郊注想未替歸心浩然何待奉計榮名燕居十有六年為而不恃五福天全赫赫斯文振振厥後詩以聲之公乎

不朽

